

## Ess longt uns mett dene Fliecher

Omm letzde Sunndaach hott mich moin ahle Kumpel Hubert oogerufe. Hannes, hotter gesaat, was ist denn bei euch los? Wie ist das denn mit den Flugzeugen?

Ei gude, Hubert, habb ich gesaat, waaßde, mir wisse joo schunn long, dass die iwver Flerschem so dief erunnerkumme, mir hadde dess joo schunn emol im Flerschemer Wald geseh unn dort aach de Lärm von de Fliecher gemesse. Doo driwwe hadd awwer de Waldbottem vill Krach verschluckt, unn jetz isses su, dass die Heiser unn die Strooße de Krach spieschele, also hie unn her werfe, unn doodorsch iss dess su schlimm wies kooner von uns es sich hott vorstelle kenne. Es iss forchbar, saach ich dir.

Und, mein Freund, frächt de Hubert, macht ihr dies denn öffentlich?

Joo, gebb ich ze Antwort, die Zeidunge sinn voll mett Frooche von de Presse unn Ontworte von de Leit, die gonz schee wütend sinn

Wutbürger?, hott de Hubert gefroocht, Wutbürger in Flörsheim? Na so was!

Ich saach: Mehr wie dess. Unn dess merkt merr wenn so Veroostaldunge geeche de Fluchbetrieb wie die letzde Freidaache. Jedesmol warn mehr als sechshunnert Leit doo.

Moont de Hubert: Hannes, die Fraport hat so viel Geld ausgegeben, auch für die Ticona. Meint ihr, dass man ein solches Riesenbauwerk wie die Nordbahn noch stilllegen kann?

Ach, saach ich, die Frooch heer ich efter. Dann du ich immer druff hieweise, dass aach dess Kernkraftwerk Mülheim-Kärlich nor zwaa Monat geloffe iss unn dann abgeschalt worrn iss. Aach in Wackersdorf sinn zehn Milliarde Mark ausgewwe worrn unn die Oolaache dort sinn aach zugemacht worrn. Jetz iss dort so e Art Freizeitpark unn ich stell merr vor, dass unser junge Leit in e paar Jahr driwwe uffem Betong von de Londebahn mettem Fahrrad odder mett so Bretter mett Räder um die Wett fahrn kenne.

Du bist ein Spinner, hott doo de Hubert gesaat. Wie wollt ihr das denn schaffen

Ach, moon ich, de Fluchlärm hier mächt kronk, dess iss dess Motto von dem Verein Für Flörsheim, unn dess stimmt. Unn wer will verontworte, dass die Leit kronk werrn mett Schlaachoofäll unn Herzinfarkte, wer willen dess verontworte? Naa, ess iss nor so, dess muss bewiese werrn.

Und wie wollt ihr das beweisen?, frächt de Hubert.

Ja, saach ich, de erst emol werrd de Lärm bei jedem Iwwerfluch gemesse, dess mächt de Verein mettere Oolaach, die in de Weilbacher Strooß uffgebaut iss. Dann wolle merr die Fluchlärm-Gesetze ännern losse.

Ihr Flörsheimer alleine, schafft ihr das?, frächt de Hubert widder.

Ich saach: Ess sinn joo nitt alloons die Flerschemer, ess iss mittlerweile e Beweechung worrn nitt nor in de Näh, naa, all die, die aach weider weg sinn, merke longsom, dass de Fluchhafe nitt nor Wohltate iwver se ausgießt, naa, aach enn Haufe Krach. Unn weil der aach immer mehr werrn soll, saache Zehndausende von Leit: Es longt uns mett dene Fliecher, ess iss jetz mett dere Nordbohn schunn ze vill. Unn ich denk merr, Gesundheit unn de Uffstond von de Mensche um de Fluchhafe erum werrd e Umdenke schaffe.

Wie die Frau Merkel mit dem Atomausstieg?, frächt de Hubert.

Ja, saach ich, gonz genau so. Wenn enn Polidiker merkt dass er nimmi gewählt werrd, mächder enn Saldo, sogar enn Saldo rickwärts.

Eiern Honnes